



23. Aprili 2026

UPA2026/30

Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarnermik inatsisip allanngortinneqarneri pillugit inatsit (Pisortani sulisunut kissaatigineqanngitsumik, innarliisumik nikanarsaasumillu pissusilersornerup pinerluutinngortinneqarnera, inuit atornerlunneqarnerisa pinerluutinngortinneqarnerat, kinguaassiuutinut tunngasumik atortussat innarliissutaasut akiorniarlugit suliniutit patajaallisarneqarnerat, pineqaatissiinerup aalajangersarneqarnerani pissutsit sukannernerulersitsisut, toqutsisutut eqqartuussaasimasut immikkoortortaqarfimmi matoqqasumi pineqaatissinneqarnermik naammassineqarnissaannut inissinneqartarnerat il.il.) pillugu siunnersuutip Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut (Meeqqanut, Inuusuttunut, Inatsisit Atuutinneqarnerannut Naligiisitaanermullu Naalakkersuisoq)

Siumup akuersaarpaa, inatsisissatut siunnersuut manna pingaarutilinnik pisariaqartunillu arlalinnik imaqarmat, inuiaqatigiinni ineriartornermut aamma unammilligassanut, naapittakkatsinnut naleqqussarneqartunik – minnerunngitsumik digitalikkut pinerlunnernut, inunnik sanngiinnerusunik illersuineq kiisalu inatsisitigut illersugaanermut nukittorsaanermut tunngatillugu.

Ajunngitsumik isigineqarpoq pisortani sulisut akornuserneqartarnerannik pinerluuteqartitsisalernissaq siunnersuutigineqarmat. Pisortani sulisut suliassatik sularisinnaassavaat tatiginartumik, tatineqarnissamut, soorasaarneqarnissamut imaluunniit akornusersorneqarnissamut annilaanganatik. Taamatuttaaq Siumup tikilluaqquaa inunnik atornerluinermut akiuiniartoqarmat, aammalu atoqatigiinnermut tunngasunik innarliisunik imaqartunik – ilanngullugit aamma AI-mik pilersinneqartunik – akiuiniarneq nukittorsarneqarmat. Pingaaruteqarpoq inatsisit teknologip ineriartorneranik malinnaasarnissaat.

Siumup aamma pingaartippaa assigiinngisitsinermut illersuineq nukittorsarneqarnissaa, aammalu uumissuineramik tunngaveqartumik pinerluttarnerit sakkortusaataasumik atugassarititaasutut erseqqissarneqarnissaat. Inuiaqatigiit soorlu uagut pigisagut tunngavissaqartariaqarput ataqqinninnermut, naligiisitaanermut aammalu innuttaasut tamarmik toqqissisimanissaannut – tunuliaqutaat, kinaassusaat imaluunniit inuunerminni atugassarititaasut apeqqutaatinnagit.

Tamanna oqaatigereerlugu Siumup peqatigitillugu erseqqissaatigissavaa, aallartinnermili kaammattuutigisimagatsigu pinerluttulerinermut inatsisip tunngaviusumik tamakkiisumillu misissuiffigineqarnissaa. Isumaqarpugut aalajangersakkat ataasiakkaat kisimik allanngortinneqarnissaat naammattoqanngitsoq. Inatsit tamakkerlugu isigineqartariaqarpoq, taamaalilluni qulakkeerneqassammat inatsisitigut politikki ataqatigiissumik, piffissamut naleqqussumik aammalu kalaallinut tunngavilersugaasumik ineriartortinneqarnissaa.

Allannguut ataatsimoortoq Inatsisartunut ilaasortanut innuttaasunullu pitsaanerusumik tunngavissiissaaq paasiniarlugu aalajangersakkat ataasiakkaat qanoq imminnut ataqatigiinnersut



aammalu qanoq peqataatitsinersut inatsisitigut aqqissuussinermut, naapertuuttumik, pinaveersaartitsisumik aammalu iluarsartuutaasumik.

Taamaattumik Siumut isumaqarpoq inatsisissatut siunnersuut manna aqputissami alloriarnertut isigineqartariaqartoq – kisianni akissutissatut kingullertut pinnani. Naatsorsuutigaarput piffissami aggersumi pinerluttulerinermut inatsisip annertunerusumik allanngortinneqarnissaa sulissutigineqassasoq, tassani tunngaviit, aqqissuussaana aammalu atorneqartarnera tamarmik misissuiffigineqassallutik.

Naggataatigut erseqqissarneqassaaq Siumup siunnersuutip siunertai tapersersormagit, kisianni peqatigitillugu kissaatigalugu Inatsisartunut inatsisitigut suliat ataatsimoortumik ungasinnerusoq isigalugu isigineqarnissaat annertusarneqassasoq.

Taamatut oqaaseqarluta siunnersuutip Inatsisinut ataatsimiititaliamut ingerlateqqinnissaa innersuussutigaarput.